

## Declamatie-wedstried Veldeke 2019

### Ónderbouw groep 3 en 4

#### **ÓS KARELTJE**

Wets se waat leef is,  
hiel zaach en hiel fien?  
Det is ós Karelkje,  
det is miene knien.

En Karel zien breurke,  
dae neume we Piet.  
Maar dae waas met Kersmis  
in eine kier kwiet!

Maar vanaaf gister  
is Karelkje neet mier allein.  
Dreej babbies kreeg hae,  
hiel zaach en hiel klein.

Noow neume we Karel  
dus maar Karolien.  
En ik heb noow 4 vriendjes,  
hiel zaach en hiel fien!

F. Geurts-Leeder

#### **VOETBALLE**

Matje moch veur d'n ierste kier  
gaon voetballe beej de Boys, waat ein ier.  
Det waas ein hoeëgtepunt in zien laeve  
en hae zoel zich ens gans gaon gaeve!  
Hae leep zich d'n aom oet zien lief en d'n trainer zag:  
"Dich hebs 't d'r prima van aaf gebrach!"  
Wie hae thoes kwaam vroeg ziene pap:  
"En, hebs se ouk ein goal gemak?"  
"Ein goal gemak? Bis dich noow gek,  
die stónd d'r al, det zoog ik direk!"

J. van Kraay-Apeldoorn

## **EIN BEIGE VERSJE**

Ein beige knienke vónd in 't graas  
eine raegenjas dae van nemes waas.  
Beige van baove wies ónder,  
knienke vónd um hiel bezónder.

Schäöpke, kiek ens wie dae jas dich steit.  
Nae danke, gaef dae maar aan de geit.  
Geit, is dae jas meschiens van dich?  
Nae, waat ein gemekker, det is toch gen gezich?

Koe, is dit dan diene jas?  
Nae, ik dink det beige neet beej mien vlekke pas.  
Kiep, wils dich um dan perbere?  
Nae, zeker neet, dink um mien vaere!

Noow zit ein beige knienke in 't graas  
met eine raegenjas dae van nemes waas.  
Zien uerkes staeke net baove de kraag,  
en hupse geit ein bietje traoger vanaaf daen daag.

Zien stertje stik net ónder de reem oet  
en d'r steit eine breie lach op zien beige snoet.  
Want met ein puuetje in iddere mouw,  
veult hae zich hielemaol wauw!

Joyce Tabbers – Bruijnen

## **EIN BÓNT VERSJE**

Waat ik vandaag wil aete,  
det is ein goje vraog.  
Ik wil vandaag op mienen telder  
eine bónte raegenbaog.

Ein roeëje temaat, ein oranjese appelesien,  
ein stökske gaele paprika meschiens.  
Ein greun blaedje slaaj en dieke blauwe besse.  
En paars gekleurde sap um mienen dors te lesse!

Joyce Tabbers – Bruijnen

## **ERWTESOEP**

De juffrouw stelde 'n leuke vraag aan ós klas  
en det kwaam de kinder good van pas.  
“Wat vindt geej 't allerlekkerste aete?”  
Det woort efkes breid oetgemaete.  
De meiste koze veur pannekook en friet,  
Maar Wimke dach nao en antwoorde sebiet:  
“Ik heb 't leefste erwtesoep,  
as insigste oet de ganse groep”.  
Nemes snapde Wimke ziene smaak.  
“Ik vind 't neet ech lekker”, zag dae snaak.  
“Maar ik waer dao misselik van en krank.  
Dan zaet ós mam: lig dich maar efkes op de bank.  
Dan hoof ik lekker neet nao schoeël.  
Daorum vind ik erwtesoep zoeë “cool”!

J. van Kraay-Apeldoorn

## Declamatie-wedstried Veldeke 2019

Middebouw groep 5 en 6

### ÓS SCHOEËL

Zal ik óg ens waat vertelle,  
ik gaon hiel gaer nao schoeël.  
Dao kin ik van alles liere  
en det is waat ik waal woel.

Op schoeël dao kins se liere  
van kinder oet ein ander land.  
En ouk liers se fees te viere,  
d'r is altied waat aan de hand.

Neet allein feesjes hebbe weej dao,  
ouk gimmestiek en leuke meziek.  
Met taal en raekene zien weej riek,  
maar met ein dink bin ik neet klaor.

Hiel vuuel tale huurs se op ós schoeël,  
oet eder hiel vaer land, van eder kind.  
Maar 't Venloos, det is heej neet gewind  
en det is waat ik ech gaer woel.

Frans van de Rijdt

## **NAGELLAKJES**

Waat mó't ik noow keze,  
met alles is waat mis.  
Gister wis ik nog waat ik woel,  
as ik mich neet vergis.

Waat woel ik gister, raos of blauw?  
ik weit 't neet mier, waat ik gister wou.  
Of zoel ik noow toch veur oranje gaon?  
Ik weit hiel zeker det det mich ouk zoel staon.

Nao dinke, dinke waat ik in gedachte had,  
waas ik alle kleurkes waal 'n bietje zat.  
Toen bedach ik 't beste idee oeëts,  
ik had alles oet miene kop gegoeëjd.

En weit geej waat ik doon, leef minse,  
gewoeën genne nagellak op.  
Want zó'n moeëje naegel as ik,  
zoel ederein zich waal winse.

Loes Niessen (13 jaor)

## **DE KATER**

Juul loog in bed en kós neet slaope.  
Hae hoort de ganse tied gemaek, de raam stónd aope.  
"Mam, meug de raam toe?" reep de kleine Juul.  
"Ik weit neet waat ik huur, maar 't wuurt mich toch te vuuel".

"Det is de kater van de bure", zag mam, "die make sóms zó'n leweit.  
Ik zal d'r veur zörge det die dao weg geit".  
"Wie dan?" vroog Juul, "op waat veur meneer?"  
"Ik goeëj d'r gewoeën 'nen eimer water euverhaer".

'ne Gas waeke later op zónondag, waas Juul al vruug oet de vaere.  
"Wao is pap?", vroog hae aan mam, "Och, laot dae maar gewaere.  
Dae is d'r neet lekker aan, haet pien in de kop.  
Det neume ze 'ne kater" en Juul zag: "dao weit ik waal waat op".

Efkes later klónk van baove 'n hard gevlook.  
Mam stormde de trap op en Juul stónd dao beduus in 'nen hook.  
Mam zoog d'n eimer, pap zien kletsnate haor en d'r begós waat te dage.  
"Sorry", zag Juul zaach, "ik woel allein maar de kater wegjage".

Diana Vullings-Smeets

## 'T AEPKE

Beej mich op 't schaepke,  
zit 'n aepke.  
Hae haet 'n leuke snoet  
en haolt allerlei streke oet.

Daobeej 'ne lange stert,  
maar waal met 'n good hert.  
En det deer  
vluug door de kamer op en neer.

Van de lamp nao de gordien,  
't kos um gen centje pien.  
Dan weer verstop hae zich  
en zit inens op de kop beej mich.

Mam vindt um gaar neet zó'ne leuke,  
as hae bezig is in de keuke.  
Gaar neet braaf,  
hae blief nörges vanaaf!

Weit geej wao 't aepke zit?  
As weej weg gaon, zit hae vol pit!  
Waat dinks se?  
Op de schouwer, altied de linker.

Sóms zit hae d'r treurig beej,  
hae mis zien familie heej.  
Hoewaal ik vuuel veur um veul,  
hebbe weej um weggebrach nao de Apeheul.

Dao springk hae lekker rónd  
en blief fijn gezónd.  
Toch mis ik noow det aepke,  
beej mich op 't schaepke.

Piet Aben

## **KLEINE SJAAK**

Hae loog in de weeg zónder haor en zónder tand.  
'n Verfrunseld gezichje en gerimpelde hand.  
En idderein zag: "Waat is dae knap,  
hae haet de kin van mam en de neus van pap."

Sjaak woort al gauw 'ne groeëte kaerel.  
Hae zoot beej 't kerkkoeër en zóng wie 'ne maerel.  
En idderein zag: "Waat is dae knap,  
hae haet de kin van mam en de neus van pap."

Hae kós maedjes kriege, aan iddere vinger tieën.  
Oetintelik koos hae toch veur Lien.  
Same stónde ze veur de altaartrap  
en idderein fluusterde: "Waat is dae knap,  
hae haet de kin van mam en de neus van pap."

Sjaak woeënt noow al jaore in ein bejaardehoes,  
same met Lienke veult hae zich dao waal thoes.  
Hae haet gen haor mier en gen tand  
'n verfrunseld gezich en gerimpelde hand.  
Maar Lien vindt um nog altied knap,  
met de kin van mam en de neus van pap!

Bep van Bommel.

## Declamatie-wedstried Veldeke 2019

### Baovebouw groep 7 en 8

#### BANK

Pap en mam kriege cente  
en neet zó'n bietje zaet ózze pap.  
Die haole ze beej de bank zaet ós mam.  
Toch is dao dan iets det ik neet snap.

Ik heb noow al dökker gezóch  
en de bank euver houp gehaold, óndanks det det neet moch.  
Euveral gezóch wie ik in de bank dook.  
Tösse de gaetjes, ónder de kösses, zelfs in d'n hook.

Toen vroeg ik aan pap: "wao haolt geej al die cente vandaan?"  
"Nummer 120 aan de Lindelaan".  
Ik snapde dao niks van wie ózze pap det zei,  
wies hae vroeg: "wils se 'ne kier mei?"

Ik snapde d'r niks mier van,  
toen weej in de winkelstraot stopde,  
maar waat pap zag det klopde.

Papa waas hiel flot klaor,  
want al det geld veel zoeë oet de moor.  
Ik wis neet det d'r zó'n banke bestónde,  
laot die thoes maar zitte, ik heb 'n baetere gevónde.

Loes Niessen (13 jaor)

## DE FIOEËL

Femke woel gaer beej de fanfaar.  
Lekker meziek make met elkaar.  
En het woel neet zoeë maar 'n instrument.  
Nae, 't woel 'n fioeël, pas dan waas 't kóntent.

Net wie Andre Rieu dao in Mestreech.  
Of beej Viva Classic Live in 't spotleech.  
Maar iers kwaam de meziekles, want fioeël speule is gen fluitje van 'ne cent.  
't Oefende en oefende en langzaam maar zeker kreeg 't talent.

Waat iers klónk as kattegejank,  
veranderde in 'ne prachtige klank.  
Zien kleine naefke had gehoord, det Femke beej de fanfaar waas gegaon.  
"Waat speulse dao dan?" vroeg de kleine bóksebaom.

"Fioeël", zag Femke gruuets, "fiuuelkes greuje toch in d'n haof" zag de kleine vent.  
"Nae wiesneus, 'n fioeël is ouk 'n instrument.  
Maar wach ens, as ik later hiel good bin, is mich belaoef,  
det ik dan meug speule in Mestreech op 't Vriethaof".

Diana Vullings-Smeets

## MIEN MODER

Ik heb ein moder, die is net Sinterklaos.  
Die kump everal achter.....teminste haos.  
De vurrige waek, met det werme waer,  
leep d'n hÓnd van de bure zoeë lui um mich haer.  
Snieëwit is det bieës, al vanaaf zien gebaorte.  
Ouk al lóp hae nog zoeë lang in de zón te kaoke,

Broen waere, det is d'r beej Fikkie neet beej.  
Toen kreeg ik 't weer, ik zeg: "JÓng, kóm ens heej.  
Al det wit zulle weej ens vlot verhelpe  
en dich met gezóndheid euverstelpe."  
Ik heb det bieës roeëje wengskes gemak.  
De winkbrauwe greun, det waas hiel apart.

Ik meus nao schoeël, zoeë gezag, zoeë gedaon.  
En wie ik thoes kwaam, had ik 't weer gedaon.  
Ik zag: "Mam gluif mich, waat ik óg smoes.  
Fikkie loog strak te zónnebaje achter 't hoes.  
Die roeëje wengskes haet hae van de zón gekrege!"  
En mam zag: "Staon toch neet te lege.

Wae zoel det anders gedaon hebbe as dich!"  
Al had ik nog zó'n ónschóldig gezich,  
noow waas ik toch weer de kwaoje man.  
En vraog ik óg: "Wao wet die det van?"

Veldeke Krink Ech.

## POKÉMON

Funske zoot op heite kaole.  
Nog efkes wies hae Juul kós gaon haole.  
Zien buurjungske had 't hoeswerk nog neet klaor.  
Hae meus nog gedöld hebbe wies vief oor.

Funs greep zien mobieltje en spaojde zich nao de bure.  
Juul stónd al oet de raam te ture.  
"Kóm, flot, beej de kerk zit 'ne hiele zeldzame verstop".  
Funs greep ziene fiets en Juul spróng achterop.

Beej de kerk zoge ze al 'ne ganse troep jónges staon.  
"Flot, flot", zag Juul, "veurdet hae d'r tössenoeet is gegaon".  
Ze grepe eur mobieltjes en douwde heej en dao op.  
"Yes, gotcha", repe ze met 'ne blieje kop.

Ze sprónge de fiets weer op en sjeesde nao 't industrieterrein.  
Flotter en flotter ginge Funs zien bein.  
Boete aom kwame ze dao aan en pakde eur mobieltje weer.  
"Oh, dae zit heej nog neet, vanaovend kump dae heej pas haer".

Funs en Juul beslote iers nao hoes te gaon,  
wao eur moders d'n bik klaor hadde staon.  
Zoeë gezag, zoeë gedaon en nao 't aete ginge ze weer op paad.  
"Dink d'r aan", woort eur naogerope, "maak 't neet te laat".

Aangekómme op 't duustere industrieterrein,  
stónde dao al mier jónges beejein.  
Net wie ze eur mobieltjes oet de tes woele haole,  
kwaam d'r 'ne pliesiewage d'n hook um gevlaoge.

Met piepende remme stopde dae en d'r kwame twieë woute oet.  
Funs en Juul woorte gans bleik um eur snoet.  
"Wat mótt det heej zoeë laat in d'n duuster"?  
"Nou meneer de pliesie", stamelde Funs, "noow luuster.  
Weej kómme neet um in te braeke, maar hebbe andere belange.  
Weej wille allein maar Pokémons vange".

Diana Vullings-Smeets

## **JOCUS-PRINS**

Heej staon ik dan, ge-ierd publiek  
Miene naam is Piet, hald van meziek.  
Ik heb maar eine groeëte wins,  
ik waer hiel gaer de Jocus Prins.

Miene pap dae zaet, "dich bis te klein".  
Det vind ik aevel gaar neet fijn.  
Jocus Toekôms wil ik euverslaon.  
Wil beej de groeëte Hane op de buun gaon staon.

Mien adjudante heb ik al bedach,  
maar ik heb 't nog neet taege eur gezag.  
Mien buurmaedje Clara en Sofie miene schat.  
Zó'n dreej goje haet Venlo nog noeëts gehad!

Ik bin gewoeën nao Vors Joeccius gegaon  
en heb dae mien idee oet d'n aek gedaon.  
Vors Joeccius zat zien muts met vaere op miene kop,  
maar ik kós gaar niks mier zeen en reep toen: "STOP!"

Maar Vors, die muts is te groeët, vuuels te wied.  
Zoeë raak ik mich mien adjudante ouk nog kwiet."  
"Det mein ik ouk", zag toen de Vors en keek mich aan.  
"Euver inkele jaore pas dich pas dees benaan.

De bis noow te jónk, maar waal hiel kwant.  
Oeëts wuurs dich d'n baas in Jocus Land."  
Met ein tevreje gezich bin ik nao hoes gegaon  
en ik weit zeker: Op Jocus buun kóm ik ech te staon!

Hans Jacobs